



KRISTIAN THALAI



VOLUME XVII

NO. 2

|

MAY

2026

SERMON RINGTU NUN

-Kennedy Lalhmangaiha



CHARACTER STUDY

KRISTA TANTU

PAULA LEH
KRISTIAN THALAI PAWL
-Dr Mimi Lalruatsaki

REPORT

MIZORAM CHRISTIAN COLLEGE
CHANCHIN TLANGPUI
-Lalremruafati Ngente

KANTU

NE KHAWDUNGSEI
VENGLUN BRANCH

SULHNU

HRIINGLANG TLANG

REV. LAL RINMAVIA
CHANCHIN



ZIR BINGNA
**KHUAREL
CHHIATNA**

LEIMIN

-Dr C. Lalchhanhima



AN CHANCHIN

JOSEFA

**PATHIAN THLARAU
CHENCHILH**

A Day with CKTP | YRC, Falkland



Consultation meeting on Voluntary Blood Donation



N.E. Khawdungsei Venghlun Branch



Tripura PYF General Conference



KRISTIAN THALAI PAWL CHANCHINBU THLA TIN CHHUAK

Chhuah tan kum : 1970 | Kum 56-na | Kuminah vawi 5-na | Chhuah tawh zat : 570

Editor : Rochhingpuia
Joint Editors :
T. Upa H. Lalthakima
Zochhuanmawia
Lalmuanawma
Laldinpuia
C. Lalromawia
Lalbuatsaiha Khawlhing
Lalringliana
Elisianmawia
Manager : Agnes Lalrinzuali
A lak man :
Kum khatah : ₹ 100.00
Copy khat : ₹ 8.33
Thu chhuah tûr nei chuan Editor, Kristian Thalai hnenah thawn tûr a ni a; la thar duh chuan KTP Office-ah hriattirin a man pêk lâwk tur a ni.
Editor Mobile : 8794210155
Manager Mobile : 8787480280
E-Mail : kristianthalai1970@gmail.com
centralktp@gmail.com

KRISTIAN THALAI PAWL



Thupui

Rawngbawl tûra chhandam

Thupui inngahna

Ephesi 2:10 : Thil tha ti atân Krista Isuaah chuan siama awmin, ama kutchhuak kan ni si a, chu thil tha tih chu kan awmna tûrin Pathianin a buatsaih lâwk a ni.

Thil tumte

1. Isua Krista rinna leh amah anna kawnga thalaite hruai.
2. Kohhran kut ke ni tura thalaite buatsaih.
3. Kohhran hnathawh tihpuitlin.
4. Krista Chanchin Tha puan darh.

A CHHUNGA THU AWMTE

1. Editorial	2
2. Sermon: Ringtu Nun–Kennedy <i>Lalmangaiha</i>	3
3. An Chanchin Josefa-Pathian thlarau chenchilh	7
4. Zir bingna: Khuarel Chhiatna-Leimin – <i>Dr C. Lalchhanhima</i>	11
5. Character Study: Krista Tantu Paula leh Kristian Thalai Pawl . – <i>Dr Mimi Lalruatsaki</i>	16
6. Sulhnu: Rev. Lal Rinmawia Chanchin	20
7. Report: Mizoram Christian College chanchin tlangpui – <i>Lalremruati Ngente</i>	23
8. Hringlang Tlâng	28
9. Kantu: NE Khawdungsei Venghlun Branch	29
10. Hriatzauna	30
11. Keimahni	31
12. Crossword	32

COVER DESIGN

LALRINMAWIA, CHANMARI BRANCH

Fai I Tlin



Tun hma chuan Mizote hi thingbul, lungbul be ṭhin kan ni a. Chutih hunlai chuan kan bal ṭhin viau niin sawi a ni ṭhin. Zosap Missionary - te kaltlangin kan ramah Chanchin Ṭha a lo thleng a. Chumi lo kal zelah chuan Mizote pawh kawng tam takin hma kan sawn a. Chung zinga pawimawh deuh chu Faina kawng hmasawna hi a ni.

KTP General Conference Vawi 61-na Saitual-a neih zawh takah pawh khan kan hnuhma fai lo lutuk khan sawi a hlawh viau a nih kha. Kan hnuhma hnutchhiah han hmuh aṭang ringawt pawh khan Faina kawng hmasawna tur kan la ngahzia a lang chiang hle awm e.

KTP - te hi kawng engkimah kan zeiin kan changkang tawh em em a, hma pawh kan sawn viau a, thil lawmawm tak a ni. Chutihruah chuan Faina kawng hian hmasawna tur kan la ngah hlein a lang. Fai hi tute mai pawh hian kan tlin vek a. Mahni invawnfai ringawt hi kan ram leh hnam faina atan a tawk zo lo.

Faina kawng hian mimal kan pawimawh a, chumi tluk zet chuan chhungkuua inzirtirna ṭha kan mamawh a, chutiang zelin kan zirna hmunah te, kan hnathawhna leh eizawna hmunah te, tun ai hian inzirtir leh nunpui kawng ṭan la zel ila kan ram hi a va nuam dawn em!

Tifaitu kan nih theih loh chuan a tibawlhhlawhtu ni lo turin ṭan la ila, tibawlhhlawhtu kan awm loh chuan kan fai reng dawn tihna a ni. Fai hi mihring hriselna atan a pawimawh a, ringtute pawh kawng hrang hranga thianghlim turin a hnung kan zui Lal Isua khan min zirtir a. Kan tu leh fate tana chenna tlak ram nuam leh thianghlim hnutchhiah thei turin ṭan i la sauh sauh ang u.

Refugia
Editor

RINGTU NUN

(Sam 37:1-4)



Sermon



Kennedy Lalhmangaiha, Luangmual Br.

Sam Bu hi Bible-a bu sei ber a ni a, a chhungah hian kan Shriat angin Fakna hla te, Pathian tanpuina dila jawngtaina te, Pathian rinna puan chhuahna hla te a awm a, Sam hian mihring rilru leh ngaihtuahna nasa takin a khawih danglam thin a ni.

A bu phuah khawm chhung pawhin kum za aia tam a awm a, mi chi hrang hrang Lal Davida te, Mosia te, Asafa te leh Kora pawlte phuah a ni. A then chu Israel hnam anga an din chhuah tantirh laia mi a ni a, a then erawh chu Babulon sal ata an lo chhuah hnua mi an ni. A tirah Jerusalem Tempul-ah hman a ni a, chumi hnua chuan Juda te inkhawmna Synagogue-ah hman a ni leh a, hun lo kal zelah Kristian Kohhran pawhin an hman leh ta a ni.

Sam 37-na hi mihring nun inkaihhruaina leh inzirtirna pawimawh tak mai a ni a, Lal Davida'n he Sam a ziah laia thil thleng leh tunlai huna thil thleng tam tak te pawh hi a la inang hle niin a lang a ni. Lal Davida hun lai hian mi thenkhat, Pathian

thu awih duh lo leh pawisa lo, mi hausa leh hlawhtling tak tak an awm a ni ngei ang. Lal Davida chuan chung mite chu awt lo tur leh anmahni avanga intihrehawm lo turin amah a lo inhneh phawt a, a nunpui a, chutiang chuan a lo ziak chhuak ta a ni.

Sam 37:1,2 “Thil tha lo titute avangin intilungngai duh suh la, fel lo taka tite chu awt hek suh. Hlobet angin ah thlukin an awm thuai ang a, hnim hring angin an vuai dawn si a.” OV

“Mi sualte avangin intihrehawm suh la, An thil dik lo tihte awt bawk hek suh. Hlobet angin an vuai ang a, hnim hring angin an ro mai dawn si.”CL

Sam ziaktu chuan mi sualte avanga intihrehawm lo turin min hrilh a, he laia intihrehawm a tih hi misualte thiltih avanga lo thinrim leh lo lungngaih chiam a sawina a ni a. Chutianga ti lo tura min duhna chhan chu chang 2-naah hian a rawn sawi chiang bawk a. Pathianin an chungah ro a la rel dawn a, *'Hlobet angin an la vuai ang a, hnim hring angin an ro mai dawn si a.'* Sam 1-naah chuan Lalpa neitute chu *'Lui kama thing phun, a hnah vuai ngai lo'* angin a tehkhin a. Mi suaksualte chan tur nen chuan a inthlau hle a ni. He khawvelah hian kan hmuh leh hriat phak maiah pawh, Pathian thuawih lo, a duh loh zawng ti, amaherawhchu hmuingil tak anga lang an awm ṭhin. Khawvel mit aṭanga thlir chuan mi hlawhtling leh mi hausa pawh an ni mai thei. Nimahsela, chung mite tawpna tur chu a duhawm loh hle a ni.

Sam 1-naah chuan *'Nihlawhna tak tak'* kan hmu a, Sam ziaktuin nihlawhna leh lawmna a tih hi rilrua nuam ti taka awmna a tihna mai a ni lo

va. Pathian duhzawng tihnuam tia lawmna bera hmang tihna a ni. Nihlawhna leh lawmna hi Pathian duhzawng ti tura a zirtirna zawm zelna aṭanga lo awm a ni.

Tunlai hian mi tam tak chuan tangka sum tam tak neih hi nihlawhnaah an ngai a, hlim tak leh nuam ti taka awm theihna turah an ruat a. Sam leh Bible hmun dangah erawh chuan Pathian thilpek dawnga Pathian duhzawng titute hi Pathian malsawmna dawngtu, mi nihlawhte chu an ni.

Sam 37:3- Lalpa chu ring la, thil ṭha ti rawh; he ramah hian awm la, rinawmna um zel rawh.

Thuthlung Hlui pum puiah hian Pathianin Israelte hnena ram pek a tiam thu hi thu pawimawh a ni. He sam hi an hman hmelmate awpbehna hnuaia an awm laia phuah a ni mai thei. Ram tih hi nunna tihna tluk a ni a, Israel fate tan ram hi a pawimawh em em a. An nihna leh an sakhaw nun zawng zawng hi ramah hian a innghat nasa em em a ni. Pathianin

Abrahama hnena a lo tiam tawh, ram an luah tur chu Lalpa rinna leh thil tha tih nen a inzawm tlat a, Israelte chanchin kan hriat theuh angin LALPA an rin zel loh avangin ram tiam ata hnawh darh an ni ta a ni. He sam ziaktu hian Rinawmna a ngaipawimawh hle a, rinawm tur mai ni lovin rinawmna chu a uma um turin min hrilh a ni. Ringtu nunah hian rinawmna hi a pawimawh khawp mai.

Thupuan 2:10 ah chuan *‘Thih thlengin rinawmin lo awm rawh; tichuan, nunna lallukhum ka pe ang che.’* tih kan hmu a; rinawm taka Lal Isua hnung zui tur kan ni a, Pathian tana kan rinawmna chuan keimahni leh kan vela chengte laka rinawmna a keng tel tlat a ni. Miin a mihring puite laka rinawm si lovin Pathian lakah ka rinawm a ti thei lo a ni. Kan lehkha zirnaah, kan hnathawhnaah, kan nun dan kawng tinrengah rinawm taka nun hi kan tih tur a ni.

Sam 37:4 “LALPA chungah chuan lawm bawh rawh; tichuan i thinlung duhzawngte chu a pe ang che.”

He chang hi ngaihsual awl tak a ni, kan duhzawngte leh awh zawngte Pathianin min pe zel dawn tihna anga ngaih theih a ni a. Amaherawhchu chutiang chu a ni chiah lova, uluk taka kan chhiar chuan LALPA chungah lawm tur kan ni tih kan hmu a ni. Sam ziaktu hian alo hmu Chiang hle mai, miin LALPA chungah lawmna a hmuh tlat chuan a thinlung duhzawng chu he khawvel ngaiha thil hlu leh ropui ni lovin LALPA-ah bawh a awm dawn a ni. LALPA-a lawmna hmutu kan ni em tih hi kan inenfiah fo a tul hle mai. Kan lawmnate hi chatuan daih lo tur thilah kan nghat tur a ni lova, chatuana chhe thei lo LALPA-ah kan nghat tur a ni.

Pathian hi pheichham a ni lova, duh duh her chhuahna khawl a ni lo tih hi kan hriat a pawimawh khawp mai. Mi tam takin Pathian awm an rin loh chhan chu an duhzawng te Pathian hnenah an dil a, an duh duh danin Pathian awmtir an duh thin a, amaherawhchu Pathian chu chutiang a ni lova. Amah duh tak taktu leh amaha

innghat tak tak tute hnena inpuang thin Pathian a ni. Tunlai khawvelah mi tam takin rosum leh hausakna, in leh lo tha te hi Pathian malsawmna teh nan kan hmang thin a, hei hi a dik famkim lo hle mai. Pathian chuan malsawmna tam takin min vur thin a, kan chhut ngun chuan chhiar sen loh malsawmna kan dawng vek a ni. Pathian malsawmna tak tak chu kan *THINLUNGAH* hian a awm a ni.

Sam 37:5 “Iawmdan tur chu LALPA chungah nghat la, Amah chu ring la, Aman a ti vek ang.”

He chang hi Bible chang lar tak a ni a, kan hre fur awm e. He Sam ziaktu Lal Davida hian a chhiartute chu LALPA-a innghat tlat turin a fuih nasa hle a. A tawng bul lamah chuan ‘Nghat’ tih hian ‘*pe chhawng, hlan chhawng*’ tih pawh a kawk thei awm e. Kan nuna kan harsatna leh buaina te LALPA hnena kan nghah ngam a, kan theihna aia Pathian chakna kan rin tlat chuan kan velah thil tha lo titute, Pathian duh loh zawng

titute awm mah se la, Pathianin amaha lawmna neituah min siam ang a, nihlawhna dik tak, Pathian duhzawng tihnuam ti mi kan ni dawn a ni. He chang hian, ‘Pathianin min tihsak vek mai ang’ tia awm awl der der lam a kawk lova. Pathiana innghat ngam nun, Lalpaa lawmna hmu thin, thil tihna kawng engkima Pathian dah hmasa thin, Pathiana innghat tlat nun a kawk zawk a ni.

He Sam atanga kan hmuh chian em em chu Pathian a innghat ngam, rinawm tlat thin, thil tha ti thin, Lalpaa lawm tlat thin, mi dangte thil tihsual avanga lungngai leh beidawng ngai lo, Pathian beisei tlat nun hi Ringtu nun dik tak tur chu a ni tih hi a ni. Mahni nun theuh in en ila, eng kawng emaw berah hian hmasawmna tur leh zir tur kan nei mai thei.

Chutiang taka ringtu nun puitling kan neih theih nan leh ringtu puitling ni tura kan inbuatsaih zel theih nan A thu thianghlim Lalpan malsawm rawh se ●

JOSEFA - PATHIAN THLARAU CHENCHILH



Upa Zarzokima Khiangte

Jakoba leh Rakili-te tar lam fa a ni a, a pa pawhin a duat bik a, kawrfual ze hrang hranga ze awm a siamsak a. Khatih laia milianho hak ang chi a ni. Hemi avang hian a unaute pawhin an thikin an huat phah a ni. Josefa hi tlawntlai tha tak leh hmel pawh tha tak a ni. Dinmun that lai leh chhiat lai pawha Pathiana rinna nghat tlat mi, Pathian Thlarau chenchilh tlat mi a ni. Sal (bawih) atanga nihna sang tak chelh thei a nihna hi a chhinchhiah tlak hle bawk. Bible-ah hian Josefa anga nun vawng thianghlim, soal laka fihlim, petek lo, hnungtawlh lo hi sawi tur an tam lo hle a ni.

Mumang a nei - Josefa chu kum 17 mi a nihin a unaute nen an khawsaho a. A unaute thil tihsual a pa a hrilh thin a. Hei hian amah an huatna pawh a tizual hle.

Mang tum hnih a nei a, a tum khatnaah chuan a unaute buhphalin a buhphal chibai an lo buk a. A tum hnihnaah chuan ni te, thlate leh arsi sawm leh pakhat ten chibai an lo buk a. A unaute chuan diriam takin, “Nang teh chai hian kan chungah ro i rel ang maw?” tiin an chhang a. A pa pawhin hetiang ang tho hian a ti ve a ni.

A u te'n Ismael ho hnenah an hralh - Nikhat chu a u te ran rual thlaha an kal chu an chinchang hre turin Josefa chu a pa'n a tir a. Ral khata a lo kal an han hmuh chuan, “Saw mang neia a lo kal e, that ila, khuarkhurumah i thlak ang u, kan pa hnenah sakawlhin a seh kan ti dawn nia,” an ti a. Reubena erawh chuan an kut ata chhanchhuah a rilruk tlat a, khuarkhurumah i thlak zawk mai ang u, tiin rawtna a siam a, an pawm ta a. Hetih

lai hian Ismael-ho Aigupta rama thil hralh tumte an hmu a, Juda chuan Josefa chu an hnenah hralh a rawt a, tichuan tangka sawmnhinin an hralh ta a. Josefa kawr chu kelpa thisenah an chiah a, an pa Jakoba henah an thawn a, sakawlh seh ni awm takin an lantir a, an pa chu an bum a ni. Hetah hian tuhrah seng kan hmu, Jakoba pawh hian a u Esauva fa tir nihna, a pa bumin a lo chhuhsak ve tawh a ni.

Josefa leh Lal Isua an inang
Lal Isua pawh a mite hnenah a lo kal a, a miten an lawm si lo tih a ni. Josefa khuarkhuruma an thlak khan a kawr an hlihsak a, an thu a, an eiin an in a. Lal Isua pawh Krawsa Rom sipaiten an khenbeh khan a kawr an hlihsak a, Kraws bula thuin an eiin an in a ni.

Josefa leh Potifara nupui - Aigupta ramah chuan Josefa chu Pharoa hnuaiia hotu pakhat Potifara hnenah an hralh a. Pathianin a awmpui avangin a thiltih apiangah a hlawhtlintir zel a. A pu mit pawh a tlung hle a ni.

Josefa'n thlemna hautak zet a tawk - Engkim tluang takin a kal emaw a tih lain a beisei lohna kil atangin thlemna a tawk ta. A pi, Potifara nupui ngei chuan sex hmanpui turin a thlem ta tlat mai. Josefa hi tlangval kum 27 mi vel, thisen lum lai tak, tisa chakna pawh a sosan hun lai tak a ni.

Potifara nupui hming hi Zuleika-i tih a ni a, vawi khat mai pawh thlem lovin, nitin a thlem thin. Bible hian a zat a sawi lova, nitin a ti mai a, mahse a hlawhtling lo. Josefa hi lo soal duh tehreng pawh ni se la, man chhuah chu a harsa viau ang. A chhan chu a pu hian Josefa hi a ring em em a, a kutah engkim a dah phal a ni. Josefa pawh a pu tan a rinawm ve tlat a, a pi sawmna a lo do letna hi a ropui hle: “Engtin nge he soal lian tak hi tiin Pathian chungah thil ka tihsual theih ang?” a ti. Lal Davida nen han khaikhin lawk ila. Josefa chuan a nitin hna rinawm taka a thawh lain thlemna a tawk a. Davida erawh chu a sipaiten ral dova thi leh thau pawlha an beih lain

inthlahdah takin, chhunah a mu a, a thawh chuan mi nu inbual lai a hmu a, a it a, a kohtir a, sex a hmanpui nghal.

Vawikhat thlemna a tawhnaah a tlu nghal a ni. Davida hian themna a pan a, Josefa erawh chuan a do a, سوالنا a pan lo. Tunlai thleng pawha thlemna hautak chu sex leh sum hi a la ni reng. Potifara nupui ang hi tunlai pawh hian an tam awm e.

Josefa hlawhtlinna chhante:

- i) Sual lakah a inveng reng.
- ii) Pathian Thlarau chenchilh rengna avang a ni.
- iii) A pu laka a rinawmna avang a ni.

Potifara nupui Zuleika-i hian remchanna hmuin Josefa chu a thlem a, a silhfenah a lo man a, a pawh thlaksak a, Josefa a tlanchhia a. Aigupta mi finge chuan Josefa kawr hi hmalam atanga pawh thlak ni lovin duh lo chung chungin hnunglam atanga pawh thlaksak niin an sawi, an ti. Potifara nupui hlawhchham thinrim hian, vervek takin a pasal hnenah Josefa'n

pawngsual a tum chu duh lovin Josefa kawr a pawh thlaksak a, tiin a hrilh a, 'a vawtuin ek a cheh,' tih angin a tuar tur lo zawkin a tuar a, Josefa chu tan inah dah a ni ta a ni. Josefa hian Lal Isua a an lehna chu a thiamthu a sawi duh lo. Potifara te nupa kar hi tihchhiat a tum lo.

Tan inah pawh Pathianin a awmpui avangin tan in vengtu pawhin Josefa a ring a, engkim a kutah a dah a hetih lai hian Aigupta lalin a uain petu leh a chhang siamtute chuan a lung an tihawi loh avangin Josefa tannaah a rawn tantir ve a. Mang an nei ve ve a, an mang chu Josefa'n a hrilhfiahsak angin an chungah a lo thleng a, uain hlantu nun chu zuah a ni ta a. A chhuah dawn chuan Josefa'n lal hnenah a chhuahna tur rawn dilsak turin a chah mawlh mawlh a. Nimahsela a hre zui lo. Pharoa mumang neih, a mi fingen an hrilhfiah theih loh hnuah chauh uain petu hian Josefa a hre chuak leh ta a ni. Hei hi kum hnih hnuah chauh a ni. Uain petu hian a

mumang Josefa-in a hrilhfiah sak anga a lo thlen dikzia Pharoa chu a hrilh ta a. Josefa chu a kohtir vat a, mumang chu a hrifiahsak ta a. Aigupta ramah hausak tawntaw kum 7 a lo thleng ang a, buh an ngah em em ang a, kum 7 a ral hnu hian ṭam kum 7 a lo thleng ang. Chuvang chuan Pharoa chuan buh tam chhungin buhte lo chhek khawm a, ṭam kum chhunga thiam taka enkawltu tur ruat turin thurawn a pe nghal a ni. He thu Pharoan a han hriat chuan, hetiang Pathian thlarau awmna hi kan hmu zo dawn em ni?" a ti.

Josefa chu, chu hna pawimawh tak mawh la tur chuan dinhmun sang takah a dah ta a ni. Josefa hrilhlawkna ang chiah chuan a lo thleng dik ta a. Buh tam kumah chuan buh chu chhiar sen loh khawpa tam a chhek khawm a, ram dangah pawh a hralh ta a. Palestina ramah pawh ṭam a tlak avangin Josefa unaute pawh buh lei turin tum hnih lai Aigupta ramah an kal. Josefa'n a unaute hnenah a ṭum hnihnaah chauh a inpuang

duh a. A unaute hnenah Josefa thusawi hian a chungah thil lo thleng zawng zawngte hi Pathian remruatna a ni tih a pawmzia a ti lang. A thusawite chu - Mite nunna chhan turin Pathianin min lo tir hmasa a ni. Heta mi kal tirtu hi nangni inni lova, Pathian a ni zawk e, tihte hi a ni.

Tlangkawmna

Josefa nuna thil lang Chiang em em chu Pathian a rinna leh a rinawmna hi a ni a. Mahni inkhawngaihna leh vui leh vaina a nei ngai lo va, Pathian chungah pawh a hel lo. Phuba lakna rilru pawh a nei lo. Tlangval a nih lai aṭang pawha Pathian tharauva khat a ni.

Josefa ang hian ringtu tintetan hian Pathianin thil tum a nei a, chumi atan chuan mi a buatsaih ṭhin. Josefa hi kum 13 vel a buatsaih a, Mosia hi kum 80. Rinna kawng zawhnaah hian short-cut a awm lo. Rinawmna hian Pathian a chawimawi a ni. Ringtu chu tum thing angin hmun ro leh vawtah pawh a ngai rengin kan awm tur a ni ●

KHUAREL CHHIATNA-LEIMIN



ZIR BINGNA

Dr Lalchhanhima, Central Committee

Khawvel hmun hrang hranga chengte hian khuarel chhiatna kan tawn a inang lo viau mai a. Thli leh ruah (tuilian) te, lirnghing leh kangmei te tawk fo mah ila, Mizoram inang tlang taka kan tawrh nasat ber chu leimin (lei nghet lo che leh lei tawlh thlengin) a ni awm e. Hmanah chuan mihring kan tlem a, kan in leh lo sak pawh lei laih ngai lo, thing hmanga sak (Ordinary/Assam type building) a nih deuh vek avang te, kawng laih pawh a te thei ang bera ruahman a lo ni a, heng avang hian chhiatna hriat tur pawh a tlem deuh.

Amaherawhchu kawngpui pawh hman aia lian zawk, in leh lo pawh a let tam taka lian leh rit kan intihhmuh chho ta zel a. Khawi khuaah pawh thing hmanga in kan sakna hmunah khan concrete building a sak duh engemawzat kan awm ta zel a, hmasawna hian harsatna a rawn keng tel lo thei ta lo thin a ni.

Khuarel chhiatna kan tih thenkhat (tek, tuilian, lirnghing adt.) hi kan dan theih miah loh, a invenna chiaah kan tih theih a awm a, chumi rualin thenkhat erawh keimahni vanga thleng a awm ve bawk a, chung zinga langsar ber chu leimin leh a kaihhnawih hi a ni ngei ang.

Leimin hi mihring chen tlemna, in leh lo pawh assam

type kan tih mai awmna ai chuan mihring chen tamna, RCC building tamna hmunah a nasat zual avangin, helam kan hawi nasa deuh a nih pawhin lo hrethiam ila. Entirnan, hrûiha buh an chhun vum hi khawih chet loh chuan amahin chim mai lovin a awm reng thei a, nghet tak, chim/min lova thil a awm theihna awih zawng sawina hi angle of repose

(kan ṭawngin kan nei lo) an ti a. Lei pawh hian angle of repose neiin, vanduaithlak takin Mizoram hmun tam zawkah chuan he angle hi a pel deuh vek a ni. A awmziaah chuan, kan ram hi khawih chet loh pawha min mai thei a ni deuh vek a, khawih chet leh tihdanglam phei chuan a min awlsam ta em em a ni. Chuvangin hmasawna atana kan chet lakna hi fimkhur taka kan tih a pawimawh hle.

Ruahtui kan dawn tam zawngah hian tih theih kan nei lo a, amaherawhchu lei a lo thlena kan lo hmachhawn dan hian kan chhehvel min leh min lovah kawngro nasa takin a su thung. Khawpui mai ni lo, thingtlangah pawh hmana leimin awm ngai lohnaah a awm ta fo mai a, insakna leivung kawmthlanga paih ta mai leh tuidawn siam mumal loh avanga thleng a awm fo ṭhin. Kawngpui lian zawkin kan ram a dai darh a, a paihna leivung kan ngaihthah leh si a, ruah a lo surin leivung hmun chuan leimin siamin, chhiatna a thlen ve ta fo mai.

Hemi rual hian, a ram leilung insiam danin a ken tel avanga lei nghet lo hi hmun tam takah a awm a, District Capital tin hian lei nghet lo hmun kan nei deuh vek a, hetiang hmun hi mithiamte rawn chung a mumal taka enfiah a, insakna atana hman loh a him ber.

Hei bakah hian lei che hmun nia hriat si loh, nghet lo tam tak a awm ve ṭhin a, a tlangpuiin kham pangto luah mai hnuai, ram zal ṭha tak hi a nghet duh lo chawka a, fimkhur nan hman a ṭha awm e. Kan damchhunga sum leh pai khawl hmangin in hmun kan lei a, lei nghet lo hmun a nih chuan a pawiin a vanduaithlak ṭhin hle a, hetiang lama mithiam ṭhahnem tak an awm tawh a, rawn zel pawh a ṭangkai awm e.

Pialtlep hi laih chah (toe cutting) a nih loh chuan a nghet hle a, insak nan pawh ban chauh phunin a rinawm em em a ni. Amaherawhchu, kan rama nunna suat tam ber leimin hi fimkhur lo taka pial tlep laih chah

vang a ni thung. Leilung hian siamtu (composition) leh nihphung an nei vek a, hemi mil hian laih pawhin a san zawng him chin a awm zel a, mahni ngam chin leh sum neih vanga duhthawh taka laih avangin leimin kan tawng ta fo mai a, helam kawngah hian nasa taka thanharh a hun takzet a ni.

Sum leh pai tam tak sengin in leh lo kan din a, amaherawhchu kan insakna leivung paihna kan ui avangin kawmthlangah kan thehliam mai a, a fimkhur deuhah leivung chungah chuan retaining wall te han siam zui mah ila, leivunga a inngah avangin ruah a lo tla a, leivung chu lo zawpin rihna nasa tak a belh a, leimin siamin, in leh lo min phah a awm ta fo mai. Leivung trip 2/1 lek hian leimin nasa zawk a siam theih avangin, a dâwlna siam ai chuan sawrkarin paih phalna a siam hmuna paih zel hi a him zawk hle. Khawchunga leimin thlentu tam ber hi a chhan lian tak pakhat

lachhuak dawn ta ila, tuichhe paihna uluk lo hi a ni ngei ang.

Kan tui hmanin kan awmna floor a pelha ngaihtha ta mai hi chhungkaw tam tak a ziaktu pawhin a lo tawn ve tawh a ni. Mihring kan pung a, kan tui hman a lo tam a, hei vang hian tuilunkawr (drain) tha tak siamin, kan in mai ni lo, kan ram mumal taka pelin, kawr thleng ngei siam tur a ni.

Tunlaiin pipe drain kan uar hle a, mahse hei hi a chhe duhin, ruahtuiin luanna mumal a neih si loh avangin, tuilunkawr tha tak siam tluk a awm lo. Insak bit deuhna hmun, kawr pawh nana thenawm ram kaltlang ngai pawh hi tha taka inbiak a, ruahmanna siam dan ngaihtuah tlan tur a ni. Mizote hian lungrem (masonry retaining wall) hi kan ngainat viau rualin, a nih dan tur anga rem erawh a awm mang lo thung a. Hetiang lungrem hi a chakna ber chu a rihna a ni a, lung tlar khat, feet tam taka sang

kan rem te hi chuan leimin a dang zo lo mai ni lovin, amah pawh kha chim mai thei a nih avangin a hlauhawm letling hle a ni. Tin, kan lungrem siam dan a dik loh avangin a sir zawnga nek (lateral force) a dawl lo em em a, a chung lama tuilut thei a nih leh rih belh a awm phei chuan amahin a min thei a, hetiang lungrem upa deuh tawh phei chu a hlauhawm avangin a min kher nghak lova siam ṭhat a pawimawh hle.

RCC retaining wall kan uar chho viau a, hengte pawh hi tui luhna leh luanchhuahna (weep hole) mumal taka siam tel loh chuan mangkhawng a chang thei a, mahni remhriatna duhtawk mai lovin, a him tura duan IS Code zawm ngeiin siam thei ila, kan ram a him leh zual ngei ang. Lungrem ṭha tak pawh a inngahna leilung a ngheh loh chuan a hlauhawm lehzel a, zirchianna mumal tak nena hmalak thiam a ṭangkai ang. Mizopa in pakhat han sa zo hi chuan thiam kan intiin, a zir chhuak leh in tam tak lo sa tawh

te, insakna tur leilung hmun tam taka endiktute aiin fing kan inti zawk fo a, hemi kawngah hian kan ṭhanharh a hun tawh takzet a ni.

Khawpui leh mihring tamna hmunah chuan hmun kan duhthawh avangin inhnuaiyah tuizem leh septic tank kan siam nasa hle a, hetiang hian in ban (foundation pillar) a chiah hnip theiin, in nghet lo a siam thei a. Tin, kawmthlanga septic tank khur leh vawk in dah avanga leimin pawh ṭahnem tak kan tawng ta. Tun hnaiah plastic aṭanga siam septic tank kan uar chho a, tin, leihnuaiyah tui dahkhawlna siam lova, ground floor a barrel hmanga tui dahkhawl kan intihmuh chho ta zel a, a lawmawm takzet a ni.

Vawk in hian lei a chiah zawp nasat bakah, sazu in kua hreuhin, lei an ti thawl nasa hle a, hei hian leimin a siam ṭhin bakah a hnua insak leh nan pawh a hlauhawm ṭhin. Inbul lawka a awm hian a rimchhiain, ṭhenawm inhmaizah vangin kan

insawisel lo mai zawk a ni. Tin, himna atana a pawimawh em avangin mahni kawmthlangah pheichuan vulh hauh loh tur a ni a. Fianrial, leimin a siam mai lohna turah, a vawk in thlang chiaha RCC drain tha tak, vawk ek leh tui chhia lo lakhawm a, tuiluan kawra mumal taka paih nghal vek theihnaah chauh vulh tum ila, leimin tam tak hi kan pumpelh ngei ang.

Zin veivahnaah ruah a lo sur chuan, sabereka khuangkaih a hlauhawm avangin kawr bulah chawlh loh tur a ni a. Tin, kopang sang tak hnuai emaw, kawng thlang lam lungrem chung a emaw chawlh loh a him bawk. A tha berah chuan mual zal lai, kawng chhak leh thlang minin a tihbuai phak lohnaah awm hram tur a ni. Mihring cheng kan tam a, kan tui hman a tam tawh bakah tuiluankawr a that zel tawh avangin ruahsur hlekah luite tui a lian chak tawh em em a, fur lain khaw hnuai luite ah awm tam loh a him bawk.

Khuarel chhiatna zingah leimin hi kan tuar nasa ber a, invenna lam erawh kan la ngaihthah viau lawi si. Thuziak pakhatah ziah sen rual a ni lo a, pawimawh leh ngaimawh zual nia lang kan han tilang a ni a, fiah lo leh chiang tawk lo pawh a awm ngei ang. A pawimawh ber erawh chu min tiharhtu (awareness) lo ni thei se, kan hma lawka furpui lo thlang tur hi inring zawka kan hmachhawn chuan chhiatna tam tak lakah kan inveng thei dawn a ni.

Pathianin chenna turin tlangram nuam tak min pe a, sik leh sa nuam viau mah se a ram leilungin uluk leh duat taka enkawl a mamawh a, dimdawi loh chuan chhiatna min thlen thei a ni tih pawm ngam ila, tin, himna tura thawk chhuak tur hi sawrkar chauh a ni lo a, mimal tin kan ni tih hre thar leh ang u. Roreltuten kan himna turin dan tha tak tak an duang a, hnawksak ti mai lo a zawm hi a Pathian thu em em a ni ●

Krista Ṭantu Paula (KṬP) leh Kristian Ṭhalai Pawl (KṬP)



CHARACTER STUDY

*Dr Mimi Lalruatsaki, Associate Professor,
Harding Theological College, Tura, Meghalaya*

Tirhkoh Paula, Bible a missionary lar em em kha a nun hmasa lamah ringtute tiduhdahtu ni mah se la, a hun tawpah erawh Krista tan a Martar a ni thung a. A thih pawhin Lalpa tan a ni tih a hrechiang ang chiah khan a nun pawhin Lalpa tan a nung a ni tih a hrechiang bawh.

Krista Ṭantu Paula (KṬP) chu tu nge? Paula te hun lai khan hming pakhat aia tam neih kha thil danglam a ni lo a, Juda hming leh, Grik emaw Rome hming te an nei kawp ṭhin.

Chutiangin Paula tih hi a Rome hming a ni a, Saula tih hi a Juda hming a ni thung a. Saula pawh kha a pianthar hnu khan Jentail te zinga rawng a bawl avang khan a Rome hming zawk Paula tih kha Rome mite leh Greek ṭawng hmangte bulah hman a nih pah hial mai thei. Paula chu Kilikia khawpui Tarsa khuaah a piang a (Tirh 21:39; 22:3), Juda dan thlapa ni riat ni a serhtan, Israela thlah a mi, Benjamina chia mi, Hebraite

laka Hebrai a piang, Dan lamah chuan Pharisai leh felna lama sawisel bo, ṭahnem ngaih lamah chuan Kohhranho tiduhdahtu (Phil3:5-6) a inti hial. Tunlai khawvel thil ni ta se engkima mi aia chungnunna nei, mi thiam filawr, hming bulah mai ni lo, hming tawpa degree intlar dal tham nei tur a ni ngei ang. Thil ṭha lo lamah pawh mi baka tlan leh pawikhawih nasa tak, kohhranho tiduhdah ṭhintu a ni.

Mahse chung mihring lama chhuan tur a neih zawng zawngte chu Krista avangin channaah, hnawmhneah a ruat a. Krista tlawmna nun zawkin a ke pen a chhiep rem zawk a, tiam chin lam panin a tlan zawk a ni.

Krista Ṭantu Paula (KṬP)
nihna/identity: Paula hian a identity a sawi chu Van khua leh tui (Phil 3:20)- a ni tawp mai a. A Citizenship neih hi pui tak a ni. Identity ṭha leh hlu ber chatuan daih Identity neitu a ni a. Paula chuan chu Identity lehlam a sawi ve thung erawh chu Krista kraws hmelma (Phil 3:18) tiin a sawi thung a. Chung Identity neitute tawpna erawh chu boralna, an ropuina pawh mualphona niin khawvel thil an duh tiin a sawi a. Khaw lam nihna (Identity) neitu nge kan nih ve ang le? Paula Identity pawimawh lutuk dang leh chu “Isua Krista bawih, tirh koh ni tura koh, Pathian Chanchin Ṭha hril tura tihhran” (Rom 1:1) a ni. Bawih a nihna a hrechiang angin a rawngbawlsak tur a pu chu a hre chiang a. Khawvel thil nena inpawlh ni lo, Chanchin Ṭha hril tura tihhran a nihzia a chiang.

Krista Ṭantu Paula (KṬP)
tawrhna rah: Philipi khuua mite hnena Paula lehkhathawna kan hmuhah chuan, Krista

avangin a tuar nasa a, mahse chu a tawrhna avang chuan Praitorian sipai pawl zawng zawng leh mi dang zawng zawng hnenah Krista vang a ni tih erawh a lang chhuak hial a ni.

Chu mai a ni lo, ringtu dang tan chakna hnar, Pathian thu hril tihwaitu a ni tel bawk. Chanchin Ṭha a hrilna kawngah - man te, tan ina khung te, tihduhdahna te leh harsatna a tawk nasa em em a, chuang chuan a nunna kha lo tawp ta pawh ni se Krista vanga thi a ni dawn tih a hria a, tin nung damin awm pawh ni se Krista vang tho a ni dawn a, a enga pawh thleng se a tan chuan hlawkna a ni ve ve a ti hial a ni. Mahse, Krista hnena awm a, thih chu chak viau mah se la; a rawngbawlsakte tan Chanchin Ṭha ṭulna chu a thlang zawk a ni. Ringtute chu fuihin, Krista chu rin chauh ni lo, Amah avanga tuar pawh phal a nihzia a hriattir a ni.

Krista Ṭantu Paula (KṬP)
rilru hrisel leh nun nghet:

Paula chuan ringtute chu- a dik apiang, a zahawm apiang, a felapiang, a thangmawi apiang, ṭhatna awm leh fakna a awm chuan chung chu ngaihtuah rawh u a ti a. Heng zawng zawng hi kan khaikhawm chuan Kristian rilru hrisel leh nun nghet a ni thei ngei ang.

Paula khan eng ang pawhin awm mah se lungawi a ching a, tlachham leh hausa a awm te, tlai leh rilṭam a awm dan te a thiam thu a sawi a ni. Chu chuan a entir chu Krista avanga nun nghet a neihzia a ni. Malsawmna a dawn chang leh harsatna, tihduhdahna a tawrh chang pawhin awm dan a thiam a, a thi emaw, a dam emaw, hlawkna a nihzia a hrechiang. Paula chanchin a kan hmuh tam tak chu ama nun leh paltlang (experience) ngei hmangin mi dangte a fuih a, Ka awm dan hi zir rawh u (Phil 3:17; 1 Kor 4:16) ti hialin mi dangte entawn turin a nun a hmang a ni.

Kristian Ṭhalai Pawl (KṬP):

Krista Ṭantu Paula (KṬP) kan sawi lan tak atang hian keini Kristian Ṭhalai Pawl (KTP)-te hi han inen ve thung ila. Vawiina KṬP-te hian khawvel thila kan nihna/Identity neih a inang lo ngei ang. Keimahni lamah chhuan viau tur neih loh paw'n chhungte emaw, ṭhiante emaw chhuan tur neih pawh nuam kan ti ṭhin.

Mahse Tirhkoh Paula chuan chung ropuina leh a chhuan tur zawng zawng a neihte pawh chu Krista avangin chan a huam a, Krista nun tlawmna zawk chu a nun chhuahpui a ni. Khawvel thila chhuan tur zawng zawng hnawltu Paula chuan Krista bawih, tirhkoh a nihzia a hre Chiang a, Chanchin Ṭha hril tura tihhran a in ti hial. KṬP memberte hian kan nihna/Identity chhuan tur kan nei ve a nih pawhin Krista khawngaihna avanga kan chan a ni tih hria ila, mi dangte hliamtu atan ni lo, rawngbawlna hmanrua atana

kan chan a ni tih kan hriat a pawimawh. Kan nihna ang ang, kan theihna ang ang hmanga rawngbawlina kawngah inserh ngam, chawhpawlh nun hnawla, Krista bawih kan nih inhriat a t̄ul hle.

T̄halaite nunah hian harsatna tam tak a awma, chung kan harsatna tawh chu eng pawh ni se la, kan ringtupuite thlarau malsawmna a thlen ve ang em? Harsatna te, manganna kan tawh te hi Krista vanga kan tawrh nge, keimahni tihsual emaw fel loh vanga kan tawrh? Krista avang hian eng nge kan tawrh ve le? Paula anga tan ina khung te, tihduhdahnate kan hmaah a awm lo, mahse, Isua hnung kan zuinaah Kristian T̄halai Pawl member kan nih avangin tawrh tur kan nei theuh ang. Khawlum lutuk emaw, fur ruah sur karah KṚP rawngbawlina kawng hrang hrangah kan tel hram hram a t̄ul thin a. Nitin khawsak eizawmna kawnga kan buaina karah te, zirna leh rawngbawlina kan tih kawp a ngaih chang te hian

Krista tana tuarna tur kan nei ve lo maw? Chung kan tawrh ve na kaltlang chuan keimahni chauh ni lo, kan rawngbawlpuite tan malsawmna kan ni thei asin.

A tawp berah chuan Krista T̄antu Paula (KṚP) khan Biak in leh rawngbawlina huang bak pela nun dan min zirtir a. Social Media a kan nun dan te, kan khawlai hawiher leh inbelna te, kan ngainat zawng te, kan eizawmna kawnga dikna tan kawngah te, mi dangte hmuh phak lova kan awm dan te a huam vek a ni. Rethei leh hausu, tlai leh ril̄tama awm dan thiamtu Paula nun nghet ang nei ila chuan, nun hlutna kan neih phah ngei ang.

Krista T̄antu Paula (KṚP) nun at̄ang hian vawiina Kristian T̄halai Pawl (KṚP) member-te hian zirtur kan nei theuhvin a rinawma. Paula anga Kristaa kan identity kan chian te, mi dang tana malsawmna ni tura tawrh huam te, rilru hrisel leh nun nghet neih ve theuh i tumang u ●



REV. LAL RINMAWIA CHANCHIN

Rev. Lal Rinmawia hi August 29, 1938 khan Bukpui khuaah a piang a. A pa chu RT Khuma niin, a nu chu B. Zaihanghi a ni. A nu hi Bukpui khuaah Middle School zirtirtu a ni thin a, heta an awm lai hian a piang a ni. October 23, 1963 khan K. Zopari nen an innei a, fa - mipa pathum leh hmeichhia pakhat an nei.

Zirna lam :

Rev. Lal Rinmawia hian Primary School hi Mission Primary School, tuna Sikulsen, Mission Vengah kum 1948 khan a zo va, kum 1951 khan Sikulpui atangin Middle English a zo leh a ni. Mizo High School atangin kum 1956 khan Matric a pass a. Matric a pass hnu hian PWD hnuaiah LDA-in a thawk nghal a. Sorkar hna thawk chung hian Shillong-a St. Edmund's College-ah Evening Class zawmin, heta tang hian I.A. leh B.A. a zir zo leh a. Chumi hnuaiah Sorkar hna bansanin, Synod hnuaiah a lut a, Leonard Theological College, Jabalpur-ah Bachelor



of Religious Education (BRE)

a zir leh a, hemi kum vek hian Jabalpur-ah hian Evening Class kal chungin M.A. (Pol. Sc.) a zir zo bawk. BRE a zir zawh hian Serampore College-ah external-in BD a zir a, tha takin a pass leh bawk a ni.

Central KṚP-a a sulhnute leh a rawngbawlna chanchin :

Matric a pass hnu hian an chungkaw dinhmun avangin lehkha a zir chhunzawm mai thei lo a. Sorkar hna a dil a, kum 1956 atang khan PWD hnuaiah LDA hna a thawk a. Shillong-a Accountant General Office-ah Account training a zawh

hnuin Assistant Divisional Accountant hna a thawk a. Kum 1963 aṅang khan Development & Panchayat Department-ah Internal Auditor hna a thawk a. Kum 1968 aṅang khan sorkar hna thawk chungin Central KṛP General Secretary hna a chelh a.

Central KṛP hian Synod-ah full time Secretary neih an dil ṭhin a, a hlawhtling mai thei lo a. An dil nawn fo hnu chuan Synod chuan KṛP full time Secretary atana training-a tirh tur mi zawn an rel a. Hei hi a tana rawngbawlna kawng inhawn ṭanna nia ngaiin a hna bansan huamin a dil ve ta a. Vanneihthlak takin lak a ni ta a ni. Leonard Theological College-ah BRE a zir a. Kum 1973 khan BRE hi zir zovin, Central KṛP General Secretary-ah hun puma thawk hmasa ber ni turin a zawm ta a ni. Hetih hunlai hian Coordinator hi Synod Worker tih an ni ṭhin a, CKṛP-a awm chu Youth Worker tia sawi an ni ṭhin. Kum 1970 a Kristian Ṭhalai chanchinbu

chhuah ṭan a nih khan mawhphurtu hranpa ruat a nih loh avangin a hun laia KṛP General Secretary a nih lai a lo ni bawk a, ani hian mawh la-in a buaipui ta a, Editor hming pu lo mah se, Editor hmasa ber a ni, ti ila a sual awm lo ve. Tin, Central KṛP-ah hian General Secretary a nih hma pawh hian Committee member-ah kum 1965-1966, 1971-1972 Assistant Secy 1966-1968 a lo ni tawh a, General Secretary hi kum 1968-1971, 1974-1980 ah te a lo chelh tawh a ni.

Kum 1978 khan Pro. Pastor atan lak a ni a, Venghlui Bialah dah a ni a, kum 1980 khan Synod Inkhawmpui, Dawrupuia neihah nemngheh a ni. Mizo Pastor zinga National Council of Churches in India (NCCI) a Secretary ni tura tirh hmasak ber a ni a. NCCI-a a thawh laia Nagpur-a an awm lai hian India rama Sunday School movement siam ṭhat tumin a bei nasa viau a, All India Sunday School Association pawh hi an din a

ni a, a hming pawh hi a phuah a ni nghe nghe. India ram luh chilh tura Calcutta Mission Field Secretary atana Synod Mission Board-in a tirh hmasak ber a ni a. Presbyterian Youth Fellowship (PYF) Secretary hmasa ber a ni bawk a, term hnih a chelh a ni.

Rawng a bawl chhunga a hna chelh hrang hrangte:-

1. Synod Youth Worker - 1973-1980
2. Senior Secretary, NCCI - 1981-1987
3. Synod Hospital Chaplain - 1987
4. Calcutta Mission Field Secretary - 1988-1993
5. Synod Mission Board Secretary - 1994-1996
6. Pastor, Dawrpui Pastor Bial - 1997
7. Synod Moderator - 1998

Kum 1999, January ni 1 khan Pension-in a chhuak a, Khatla vengah an inbengbel a, a pension hnu pawh hian Zoram Evangelical Fellowship (ZEF) in an sawmna chu chhângin ZEF Executive Secretary

rawngbawl hna kum 16 chhung zet a thawk a ni.

Hengte bakah hian PCI Executive Committee Member leh PCI Mission & Evangelism Committee Member a ni tawh a. Synod hnuaih Synod Executive, Ramthar Committee, Music Committee, Sunday School Committee leh Board hrang hrangah Committee Member a lo ni tawh bawk. Tin, Kristian Hla Bu No. 230-na, 'Ngai teh Pathian ni ropui' tih hla hi a lehlin a ni a, hei bakah hian 'Phurrit a bo ta Kalvariah' tih te, 'Tawngtai theihnghilh suh' tih leh Kristian hla dang eng emaw zat a letling bawk.

A hun hnuhnung :

Pathianin rei tak, kum 88 thleng a damtir a, Mizoram Presbyterian Kohhran tana hna tam tak thawktu chu natna hrang hrangin a tlakbuak avangin Ebenezer Hospital, Chawnpui Vengah a dam leh theihna tura enkawl a nih mek laiin February 9, 2026 (Thawhtanni) tlai dar 4:18 khan lawmman ropui zawk hmu turin Lalpa hnenah koh haw a ni ta a ni ●

MIZORAM CHRISTIAN COLLEGE CHANCHIN TLANGPUI

REPORT



Lalremruati Ngente, Asst Professor

1. A lo pian dan:

Synod Inkhawmpuiah hian Secular College din rawtna hi tum eng emaw zat sawiho a lo ni tawh a, an sawi tanna tak chu kum 1995 Synod kha a ni. Amaherawhchu, rokhawlhna hrang hrang avangin din a ni mai lo. Kum 2017 Synod Inkhawmpui vawi 94-na, Bungkawn Kohhran Biak Ina neih chuan Secular College din chu a remti ta a (Synod 2017, Gen. 35). Bawhzui ngaite bawhzui turin SEC ruat a ni a, SEC chuan hma la zelin College hming atan *'Mizoram Christian College'* tih chu thlan a ni.

College din tur hian Mizoram Sawrkar leh Mizoram University atangin phalna hmuh a ni a. October 5, 2020 khan Synod Moderator Rev. R. Lalchangliana chuan JM Lloyd Hall, Synod Office-ah Mizoram Christian College hi a hawng a, he ni hi MCC din tan ni-ah pawm a ni (*SEC 291:26*

of September 21-23, 2021). Mizoram Christian College 'motto' atan hian 'For God and My Country (Pathian leh kan ram tan)' tih chu hman a ni a, kum 2020 Synod chuan MCC Governing Board pawh Board puitlingah a siam ta bawh.

2. Bul tanna:

A tirah Synod-in retired minister Rev. Dr. Lalchungnunga, Zarkawt chu kum hnih (2020-2022) chhung atan MCC Principal ni turin a ruat a, ani hian July 8, 2020-ah a hna a zawm. Assistant Professor 14 leh Librarian te chuan October 1, 2020-ah hna an zawm a. Non-Teaching Staff mi 4-te erawh Covid-19 hrileng avangin Synod Service Board-in an la tlai hret a, October 7, 2020-ah hna an zawm thung.

Tanhril-a Synod ram MCC permanent building tur chu peih fel mai a la nih loh avangin a tirah Synod

Conference Centre First Floor Room No. 9 chu temporary office atan hman a ni a, hetah hian a remchan dan anga admission tiin bul tan a ni. Hemi hnu hian class kal nan Synod HSS building hlui Mission Vengthlanga mi chu MCC building tura chei that leh a ni a, peih fel a nih hnuah December 4, 2020 khan luah tan a ni.

3. Subject offered leh Fees:

Mizoram Christian College-ah hian Bachelor of Arts (*English, Mizo, Political Science, Public Administration, Sociology*), Bachelor of Commerce (B.Com) leh Bachelor of Business Administration (BBA) te a zir theih a, thla tin Tuition fees chawi a ngai thung. Bachelor of Arts (BA) zirlai tan thla tin ₹2,000/-, Bachelor of Commerce (*B.Com*) leh Bachelor of Business Administration (*BBA*) zirlai tan ₹ 3,000/- thla tin chawi a ngai a ni.

4. Thawktute leh College building:

Tun dinhmunah MCC- a thawktu awm mek dan chu -

Principal-1, Faculty-31, Non-Teaching Staff-8, kan vaiin mi 40 kan ni a. Tuna MCC Principal ni mek Upa Dr. Tawnenga, Mission Veng hi SEC 296:23 of Dt. 22-24.2.2022 chuan June 2022 – May 2024 thleng Principal atan a ruat a, a term a hman zawh hnuah SEC 306:21 of Dt. 20-22.2.2024 chuan June 2024 – May 2026 thleng Principal turin a ruat nawn leh a ni. MCC hian Synod HSS building hlui kan luah mek a, an campus chhungah awm vein; hetah hian BA zirlaiten class an kal thin. B.Com leh BBA zirlaite tan Pu Nghaklianmawia Building, Mission Vengthlanga mi chu luah a ni bawk.

5. University Results:

MCC a tang hian Graduate Batch hnih (2023 & 2024) kan nei ve tawh a, Pathian khawngaihna zarah kan result pawh a tha ve viau a, kan lawm hle.

MZU Under Graduate Results 2023-ah 84.72%-in an pass a. MZU Top 10 Rank Holders hi BBA-ah MCC zirlai pali an lang a, 2-na, 4-na, 5-na leh 8-na te an hauh a ni. Tin,

English Subject-ah MCC zirlai pahnih an lang bawk a, 6-na leh 7-na te an hauh a ni.

MZU Under Graduate Results 2024-ah 80% in an pass a. University Top 10 Rank Holders pathum hetiang hian kan nei bawk –

Daniel Rinmuanpuia

– 1st Position in Public Administration

Magdalene Laltilanhlui Khiangte

– 3rd Position in English

H. Lalthantluanga

– 5th Position in Sociology

6. Mizoram Christian College danglamna thenkhatte:

1) Pathian thu lama Inkaihhraina:

a) Devotion: Pathian biak inkhawm kar tin Thawhtanni apiangin neih thin a ni a, hetah hian zirlai department hrang hrangten hun an inhman chhawk thin a, thupui thlan bik zirna hunah zirtirtuten thu an sawi thin bawk.

b) Exam hall-a inhlan: Exam Hall-ah Pathian hnenah inhlan ziah a ni.

c) Retreat: Retreat kum khatah wawi khat neih a ni a, Final

Semester-te pualin wawi 1 neih tura ruahman a ni bawk.

d) A Day with Central KTP:

Final Semester zirlaite chu thalaite harsatna leh rawngbawl dan tur inkaihhraina atan 'A day with Central KTP' tih chu CKTP hruaituten an neihpui thin.

e) Kohhran ni pawimawh hman: Kohhran ni pawimawh eg; Hospital Sunday-te a remchan dan angin a tuk Thawhtanni inkhawmah hman thin a ni.

f) Clinical Psychologist : Zirlai harsatna neiten an pan theih turin Clinical Psychologist rawih a ni a, zirlaiten an class off lai leh anmahni remchan dana Clinical Psychologist a thlawna pan mai tur an nei hi an tangkaipuiin an hlawkpui hle a ni.

2) Zirna kawnga hmalakna :

a) Mizoram Christian College Initium Course (College zawm tur tuaihriamna): He course hi first semester zirlai rawn lut tharte tan bika duan a ni. Pawl 12 zirlai atanga College Syllabus zir turten harsatna an neih loh nan he Initium Course hi siam a ni a. College lut tharte

tan College kalphung leh dan zawm tur pawimawhte inhrilh hriat nan hman a ni bawk. He course-ah hian zirlaite chu an zir tur, hna zawna leh ni tin nuna an zirlai an hman ṭangkai theih dan tur entir hmasak an nih avangin, hei hian zirlaiteah phurna a pe a, mawlmang taka an zirlai zir tawp lo a, awmze nei zawka zir tumna kawngah pawh a kaihruai hle a ni.

b) Mizoram Christian College Peractio Course (College inlak thleng ṭhin. He programme hi zirtir dan leh kalhmang ṭha zawk hmuh chhuah nan a ṭangkai a, zirtirtute khaw hawi a tizauin College dangte nen inlaichinna leh thawhhona ṭha zawk a thlen bawk.

c) Off Campus class: Off Campus Class hi Departmenten an remchan angin an huaihawt ṭhin. Class neihna hmun atan hian syllabus chhunga thu leh hmunte a tak tak emaw, an mitthla theih dan tur ngaihtuah puiin zir tur thupui pawh thlan a ni a. Off Campus Class-ah hian zirlaiten an zirlai an bengkhawn lehzual a, an

hriat reng theih phah bawk. Zirtirtute leh zirlaite inpawhna ṭha lehzual a siam hle bawk a ni.

d) Teachers Exchange: MCC zirtirtute leh College danga zirtirtute inbe remin class an inlak thleng ṭhin. He programme hi zirtir dan leh kalhmang ṭha zawk hmuh chhuah nan a ṭangkai a, zirtirtute khaw hawi a tizauin College dangte nen inlaichinna leh thawh hona ṭha zawk a thlen bawk.

e) Rural Expedition: Arts stream-a 5th Semester zirlai 30 thlan chhuahte tan thingtlang nun leh khawsak dan a taka an tawn nan leh an zirlai pui thei turin kum tin buatsaih a ni. Zirlaiten an subject milin an zin report an theh lut ṭheuh bawk. He course hi zirlaiten hna an thawh hunah, an hnathawhna hmuna mite nunphung zela an insiamrem thiam nan leh, Mizoram thingtlang khaw hrang hrang tihhmasawna kawnga mi ṭangkai an nih theih nan, an lehkha zirlai aṭanga lo intuaihriam lawkna tura duan a nih angin, zirlaite pawhin an hlawkpui a, ngaihtuahna zau

zawk leh thil thlir thiamna a pe nasa hle a ni.

f) Industrial Visits: Management leh Commerce 5th Semester zirlai zawng zawngte tan buatsaih a ni a, report an pe vek baw.

g) Mentoring: Zirtirtu tinin zirlai enkawl bik neini – zirna, chhungkua leh sum lama an harsatna hrang hrangte sawipuiin a sut kian dan tur, theih tawpin an ngaihtuahpui thin.

h) Special Lecture/Invited Lecture: Semester tinah a remchan danin zirlaite chhawrtangkai theih ngei zirtirna pe turin mi thiam bik sawm thin an ni.


7. Tuition fee chungchang : MCC hian zirlai thiam thei leh mark hmu tha te, zirlai khawsak harsa zirna lama thahnemngai baw te, sports leh thil danga talent nei tha bik te leh zirlai tuition fee peksaktu nei te fee awl theih dan a siam a. Zirlai taima, sum leh pai lama harsatna neiten zirna tha an

dawn theih nana hmalakna a ni. He hmalakna atan hian Kohhran, KṬP, Kohhran Pavalai Pawl leh Kohhran Hmeichhiate tan zirlai harsa, taima si ten zirna tha an dawn theih nan sponsor theih a ni baw.

8. Tlangkawmna:

Mizoram Christian College (MCC) hi College naupangtê a ni a, mamawh leh tih tur hmachhawp pawh a la ngah khawp mai. *‘For God and My Country’* tih thupuia neitu kan nih angin zirlaiten degree an neih ringawt kan ngai pawimawh ber lo va, degree an neih hnuah thiamna tak tak neia Pathian leh kan ram tan chhawrtlak an nih theihna turin theih tawpa hma lak a ni. Tin, zirlai leh thawktute nungchang leh thlarau lam nunah pawh hma an sawn theih nan theih tawpa hma lak a ni baw.

Mizoram Christian College hi kohhran mipui zawng zawngte ta a nih angin kan zavaia kan mawhphurhna a ni a, hlawhtling taka a kal zel theih nan Pathian hnenah i thawngtaipui thin ang u ●



HRINGLANG TLÁNG

INRING RAWH U

Inring renga awm a ṭul thu hi vawi tam tak Bible-ah kan hmu a. Matthaia 26:41-ah chuan, *‘Thlemnaa in luh loh nan inring rengin ṭawngṭai rawh u; thlarau zawngin a peih a, tisa erawh chu a chak lo a ni,’* a ti a. Matthaia 24:44-ah pawh, *‘Chuvangin, nangni pawh inring rengin awm rawh u, in rin loh hunah Mihring Fapa a lo kal dawn si a.’* a ti bawk a ni.

Lal Isua lo kal hun tur kan hriat loh avangin inring reng turin min duh a. He thu min pek hi kan ngaih pawimawh loh chuan inchhirin awmzia a nei thei tawh hauh lo ang.

Chhun pachangah naupang pakhat hi ṭhutthlengah a mu a, a mu tui em em mai a, a muttui vanglai tak mai chuan ṭhutthleng aṭang chuan a tla thla nawlh mai a, a pa chuan, “Mama, eng nga tinge i tlak mai?” a ti a. Naupang chuan, “Ka lo muhil tui lutuk a, ka tla ṭep tih chu hria ila ka insiamṭha ngei ang” tiin a chhang a ni.

He naupang ang hian kan lo muhil tui lutuk ang tih a hlauhawm tak zet a ni. Kan tlakna tur hi a rapthlak a ni tih hriain insiamṭhat theih hunlaia insiamṭhat hi a pawimawh em em a ni.

Luka 21:34-ah chuan, *‘Amaherawhchu fimkhur rawh u, chutilochuan ei puar lutuk nen, zu ruih nen, dam chungh khawsak ngaihtuah nen, in rilru a khat lutuk hlauh ang a, chu mi ni chuan thang awk angin thawklehkhatah in chungah a lo thleng phut ang’* tiin fimkhur turin min chah a ni ●



KANTU

N.E KHAWDUNGSEI VENGLHUN BRANCH

N.E.Khawdungsei Venghlun Branch hi April 9, 2001 khan KṬP N.E.Khawdungsei Branch aṭangin a indang a; tunah hian Member 181 awmin, mipa-119 leh hmeichhia-62 niin Branch Committee Member 26 (Ex- Officio nen) an awm mek a, April 9-12, 2026 khan Silver Jubilee ropui takin an lawm a ni.

Kumin hian Group hnih - Elija Group leh Elisa Group-ah te an inṭhen a. Sub-Committee hrang hrang : Programme, Reception & Ushering, Decoration, Media Document & Literature, Refreshment leh Evangelism Sub-Committee-te an nei bawk.

Chanchinbu ‘Ebenezer’ chu January 13, 2002 aṭanga chhuah ṭanin tun thlengin Pathianni tuk apiangin an la tichhuak thei a ni.

Kum 2026 Budget atan ₹3,25,093/- an ruahman a, Inkhawm thawhlawm, Group Budget, Electric Bill sem leh khawnte bakah inhlawhna remchang an hmuh ang ang tein sumtuak an ṭhin a ni.

Thawḥṭanni zan inkhawm hi, Thuhiril, Rilru sawi, Ṭawngtai rual, Kumpuan Thupui zir leh Hla sakho, Member inkhawm kim zan, Group Night/Conference te a hun hman ṭhin a ni.

Pathianni chawhma in- khawm banah Ṭawngtai inkhawm hun hman ṭhin a ni a, Evangelism hmalaknain member tlawh chuah, Bethel leh Bible chhiar chhuah programme te hman ṭhin a ni bawk. Biak In hawnga innei an awmin lawmpuina thuziak leh Holy Bible an hlan ṭhin a, member boralte Branch hmingin an râl ṭhin bawk.

Branch OB kum 10 chhung chawl lova ṭangte hnenah lawmpuina thuziak an hlan ṭhin. Tunah hian Branch member Missionary thawk mek pahnih an nei a, Branch hmingin mi pariat (8) an chawm mek a ni.

Branch Project atan Silver Jubilee, Kum 2026 KṬP General Conference Branch pum huapa kal, Printer lei leh Acoustic Guitar lei te an nei a, an tihlawḥtling mek zel a, Kristian Ṭhalai chanchinbu copy 41 an la mek a ni ●



SPECS & SHADES

HRIATZAUNA



1. Tarmit hmuchhuaktu hi hriat theih a ni tawh lo a, a hman hmasa bertute erawh chu kum 1284 a Italian-ho kha an ni. Henglai huna an tarmit hman erawh tunlaia tarmit kan tih nen hi chuan a danglam viau mai; beng a zeh ni loin a frame hi a hmangtute hian a hrana kengin an hman duh hunah chauh an mit zawnah an dah ṭhin. Engtiklai pawha bun chi a ni ve lo a ni!
2. Kum 1700 bawr velah khan tarmit frame chu ribbon-in a hmangtu lu-ah thlun ṭhin a ni a, a hnu deuhah tuna beng a tarmit fawng zeh hi an ching leh chauh a ni!
3. Bi-focal lens (a hla leh a hnai entheihna tarmit) hi ṭek danna hmuchhuaktu Benjamin Franklin-a hmuhchhuah kha a ni a, a thil hmuhchhuah hi amahin a hmanghal nghe nghe a ni.
4. Shades/Sun-glasses siamtu lar Ray-Ban company-te siam Aviator Shades kha Tom Cruise-a movie hlawhtling Top-Gun lar tak hnuah chauh khan civil miin an vuah ve ṭan, a hma chuan Pilot-te tan chauha siam a ni!
5. Khawvela sun-glass hman hmasa bertu chu Rome lal sual leh rawng tak Nero-a kha a ni a, ani khan lungmawi chikhat (emerald) khan sun-glass angin a hmanghal ṭhin!
6. Kum zabi 12-na velah khan China rama Court Judge-te chuan an mitmeng hlih nan sun-glass hi an lo hmanghal ve daih tawh baw!
7. Zaithiam lar Elton John hian sun-glass hi a lawm khawp mai a, engtiklai pawhin sun-glass chi hrang bun 25,000 hi chu a nei reng!
8. Khawvela mihring awm zawng zawng 50% vel hi tarmit mamawh an ni, anmahniin an mamawh a ni tih an inhre vek lo mai zawk a ni!



○ March 6-8,2026 chhunga Kohhran Hmeichhia Rorel Inkhawm wawi 13-na Champhai Vengthlang Kohhran Biak Ina neihah, Pu Nicholas Lalbiakzuala, Asst. Leader leh T.Upa H Lalthakima, C/M te an kal.

○ March 6-8,2026 chhunga Central Tripura Presbyterian Youth Fellowship General Conference wawi 24-na Tuidu Kohhrana neihah Pu Lalduhawma Chhangte, Finance Secretary leh Pu K Zoramthanga, C/M te an kal.

○ March 16,2026 (Thawhtanni) zan khan KṚP Chhinga Veng East Branch Silver Jubilee hmanpuiin Rev. Dr KM Vanlalpeka, Leader leh T.Upa H Lalthakima, C/M te an kal.

○ March 27&28,2026 chhung khan KṚP Kawkulh North Bialah Music Training neihpuiin Pu Nicholas Lalbiakzuala, Asst Leader leh Pu R Lalchhuanawma, C/M te an kal.

○ March 20, 26 (Zirtawpni) chawhnu dar 1:00 khan Zarkawt Community Hall-ah Association for Voluntary Blood Donation (AVBD) buatsaihin *'Thisen pek chungchang'* sawi ho a ni a, CKṚP OB panga leh Committee Member panga an tel thei.

○ NEICC Biennial Assembly wawi 5-na, May 21-24,2026 chhunga Resubelpara, Garo Baptist Church, N. Garo Hills, Meghalaya-a neih turah, Mizoram Synod aiawha Palai tur ruat zingah, CKṚP aiawhin Pu Nicholas Lalbiakzuala, Asst Leader leh Upa Lalzarmawia, General Secretary te an tel.

○ *'A Day With CKṚP'*: March 20,2026 (Zirtawpni) zan dar 7:00 khan Mizoram Christian College leh Central KṚP chuan *'A Day With CKṚP'* programme chu YRC Convention Centre-ah kan hmang a. *'A Day With CKṚP'* programme hi MCC-a zirlai chhuak mai tur; 6th Semester-te puala buatsaih thin niin, College zir chhuak mai tur ten Kohhran leh KṚP rawngbawlnaa hlawkna leh hmasawna an neih theihna tura buatsaih a ni ber ●

CROSSWORD

Heng a hnuai Bible khaw hming 12 hi han zawng teh :-

- | | |
|-------------|------------|
| 1. Ethiopia | 2. India |
| 3. Moab | 4. Persia |
| 5. Edom | 6. Gosen |
| 7. Israel | 8. Aigupta |
| 9. Magog | 10. Suria |
| 11. Babulon | 12. Zidon |

I	T	H	A	I	P	O	I	H	T	E
M	O	B	L	A	K	I	B	Z	D	A
A	I	D	N	I	S	V	A	K	I	T
G	L	U	M	R	E	T	B	G	B	N
O	B	G	A	U	N	A	U	J	L	O
G	U	E	O	S	A	P	L	P	U	D
Z	L	T	R	S	T	M	O	A	B	I
I	G	B	U	A	E	V	N	S	U	Z
P	E	R	S	I	A	N	M	O	D	E

ZAWHNA LEH CHHANNA HUANG

***KṬP chungchanga zawhna neite chuan a hnuai
phone number tarlanah hian zawhna a zawh theih a, a
remchan ang zelin kan zawhnate hi a chhanna nen Kristian
Ṭhalaiah hian chhuah ṭhin tum a ni e.***

Phone No: 97745 83804



**Central Kohran Hmeichhia,
Rorel Inkhawm Wawi 13-na
Champhai Vengthlang Kohran
08/03/2026**



**Chhinga Veng East Branch
Silver Jubilee
16/03/2026**



**Thenzawl Dinthar Kohran
Golden Jubilee
21/03/2026**



**Zemabawk North
Field Veng Branch,
Zaipawl Zan
23/03/2026**



**Ramhlun Vengthlang
Kohran Silver Jubilee
29/03/2026**



**Durtlang Branch,
Zaipawl Night
30/03/2026**



**Ramhlun Vengthlang
Kohran Silver Jubilee
29/03/2026**



Postal Regn. no. MZR/ 116/ 2024-2026
RNI No. MIZMIZ/2009/29074

KRISTIAN THALAI MAN PEKNA

Account hming : KTP
Account No. : 30045422892
Bank : SBI, Mission Veng Branch
IFSC Code : SBIN0007058
Account-a Chanchinbu man petufen Receipt Screenshot
Whatsapp No. 8787480280-ah thawn zel tur a ni e.

 LEADER Rev. Dr. KM Vanlalpaka (Zaka) Asst. Professor, ATC	 ASSISTANT LEADER Pu Nicholas Lalokualo (Kha-a) Tukual Bial, Tukual Branch	 GENERAL SECRETARY Upa Lalzarmawia (Zara) Coordinator i/c CTP Synod Office	 ASSISTANT SECRETARY Pu Lalratpula (Sutpula) Kulkawen Bial, Kulkawen Branch	 TREASURER Upa Lalokhalela (Fallea) Zambawek north Bial Zambawek East Branch	 FINANCE SECRETARY Pu Lalduhama Chhangte (Buhama) Khalia Bial, Khalia North Branch
 EDITOR, KRISTIAN THALAI Pu Roehingpua (Chhinga) Chamual Bial, Chamual Branch	 DIRECTOR, SYNOD CHOI Pu Vanlathamleina (Bama) Chamual West Bial, Chamual West Chawng Branch	 COMMITTEE MEMBER T Upa Lalzarmawia Khingla (Bamla) Rambun North Bial, Rambun East Branch	 COMMITTEE MEMBER T Upa N Lalhalkime (Tka) Chamual Bial, Chamual Vanghlang Branch	 COMMITTEE MEMBER Pu E. Zoramhanga (Zoramla) Rambun Bial, Rambun Vanghlang Branch	 COMMITTEE MEMBER Tv. Lachhamaawia (Zolea) Biam Veng Bial, Aizawl Veng Bial Branch
 COMMITTEE MEMBER Tv. Vashminglana (Vashminga) Siphri Bial, Siphri Branch	 COMMITTEE MEMBER Tv. Emmanuel F. Tazokima (Zara) Armed Veng Bial, Armed Veng Branch	 COMMITTEE MEMBER Tv. Vashminghanga (Teha) Lungleng Bial, Lungleng Branch	 COMMITTEE MEMBER T Upa Dr. R. Lalzarmawia (Sngawia) Venghli Bial, Aizawl Branch	 COMMITTEE MEMBER Pu Lalhualtuanga (Ahruala) Chewhnam Bial, Tuvamit Branch	 COMMITTEE MEMBER T Upa C. Rehminglana (Rohminga/Clea) Tanhli Bial, Tanhli Branch
 COMMITTEE MEMBER Pu Lalzarmawia (Bumawia) Thangawen Bial, Thangawen Branch	 COMMITTEE MEMBER Pu H. Lalchhangpanga (Chunga) Siphri Venghli Bial, Siphri Venghli Branch	 COMMITTEE MEMBER Upa Bax Mawia Th Ngalhla (Bax-a) Rambun Bial, Rangyawen Branch	 COMMITTEE MEMBER Dr. C. Lalchhankima (Chhna) Chhinga Veng Bial, Chhinga Venghlang Branch	 COMMITTEE MEMBER Tv. S. Lalduipula (Aingla) Valvokaw Bial, Valvokaw Branch	 COMMITTEE MEMBER Tv. Lalduipula (Dingla) Salkhokawen Bial, Salkhokawen Branch
 COMMITTEE MEMBER Pu Ricky Lalhiamama (Bicky-a) Bungawen Bial, Bungawen Venghli Branch	 COMMITTEE MEMBER Pu Freddy Malsawhlanga (Freddy-a) Rambun Venghli Bial, Rambun Venghli Branch	 COMMITTEE MEMBER Tv. C. Lalzarmawia (C. Sornawia) Thangpui Bial, Thangpui Branch	 COMMITTEE MEMBER Pu R. Lalchhamaawia (Chhamaawia) Lellan Bial, Lellan East Branch	 COMMITTEE MEMBER Tv. Lalhualhale Khawhling (Khae) TI Veng Bial, TI Veng Branch	 COMMITTEE MEMBER Tv. Lalhlanga (Mara) Moubawek Bial, Moubawek Branch
 COMMITTEE MEMBER Pu Lalzarmawia (Bama) Behlham Bial, Behlham Venghli Branch	 COMMITTEE MEMBER Pu E. Lalzarmawia (Bama) Bawakawen Bial, Bawakawen Branch	 COMMITTEE MEMBER Pu F. Lalzarmawia (Fallea) Ailthia Venghli Bial, Zambawek Bawakawen Branch	 COMMITTEE MEMBER T. Upa Lalzarmawia Ralte (Baka) Falkawen Bial, Falkawen East Branch	 COMMITTEE MEMBER Pu Iak Lalhankima (Iaka) Rambun Veng Bial, Rambun Thangveng Branch	 COMMITTEE MEMBER Tv. Malsawhlanga (Sanganga) Zangawen Bial, Aizawl Veng Branch
 ASS. COORDINATOR i/c CTP Agnes Lalzanzal (Agnes Bial) Synod Office					

Printed and Published by Upa Lalzarmawia, Synod Office, Mission Veng on behalf of Christian Youth Fellowship
Edited by Rochhingpua and printed at Synod Press, Mission Veng, Aizawl, Mizoram. Copies - 45,300